

# Gronda solidaritad per «Bregaglia»

Teir da gruppas: Final svizzer a Turitg

DA GION NUTEGN STGIER / ANR

■ Er schi è danovamaintg betg reuschia a Tumeigl da gudagner igl final aint igl camp D, turnada a tgesa è la grappa scu gio avant en onn cun la medaglia d'argent. Igl potenzial da far a Turitg ena medaglia vess er gia la grappa Alvra, dantant èn igls «Ardüers» sa decidias per la tgatscha an pe digl final. Igl final svizzer da gruppas è aint igl calender da teir sainza dubi la pi impurtanta occurrenza. Dalla parteida èn stadas sonda passada a Turitg 70 gruppas tgi on cumbattia an treis categorias per daventar campionesas svizras. Detg oter è chegl ple u manc l'elita svizra tgi è sa radunada agl «Albisgütli».

## Sur e Tinizong

Igl teir da gruppas dattigl gio siva digl 1950 ed anfignen avant 20 onns è igl final nazional gia li ad Olten. Siva da lò è chel li agl «Albisgütli» a Turitg e chegl adegna l'amprema sonda da settember. An chels 67 onns digl teir da gruppas on gist igls davos 20 onns varsaquantas gruppas grischunas gudagne igl final. Chegl èn per exaimpel Castrisch, Sent, Aschera e Zuoz. Las unicas gruppas surmiranas tgi on contanschia igl final nazional èn stadas Sur igl 1974 e Tinizong igl 1974 ed igl 1977, tottas dus gruppas aint igl camp B. Ossa siva 40 onns veva cun la grappa Alvra danovamaintg sa qualifitgeida ena grappa da nosa regiun



Danovamaintg angal argent per la grappa Tumeigl I: Dirk Frischknecht, Hansruedi Giger, Hermann Sgier, Urs Nauli e Carl Frischknecht (da san.).

FOTO G. N. STGIER

pigl grond event a Turitg. Igl quatter frars David, Gino, Sepli e Toni Ardüser e Maurus Engler on tratg treis fermas pre-rundas svizras e fatg uscheia igl zap aint

igl final digl camp D cun 39 otras gruppas da radond 700 gruppas. Gio la qualificaziun pigl final è stada en veir success per la grappa Alvra. Cun pero esser igls

tschintg commembers da chella grappa catscheders passiuos èn els sa decidias da betg eir a Turitg, mabagn dad eir sonda passada a tgatscha cun esser igl am-

prem de dalla tgatscha 2017. A Turitg ins è gia paca tgapientscha persiva dalla vart digls organisatours digl final. Tar la rangaziun ègl alloura er do l'egn u l'oter tschivel per la grappa Alvra, ella tgi vess gia igl potenzial da far en bung resultat aint igl final.

## Gronda solidaritad per «Bregaglia»

Tgapientscha on igls organisatours alloura gia tgi la grappa «Bregaglia» è renunzgia agl final nazional siva dalls bovas a Bondo. Per la grappa «Bregaglia» ègl alloura do grond applaus alla fegn digl final, tiers tgi ella era betg preschainta. A Turitg è la solidaritad stada fitg gronda ed exemplarica per igls Bergagliots e chegl da tottas varts. «Nossa medaglia d'argent deditgagn nous agls noss ameis da teir dalla Bergiaglia», on detg chels da Tumeigl, els tgi èn nias vicecampiuns svizzers aint igl camp D scu gio avant en onn, er schi vessan ple tgi mirito igl tetel da campions svizzers.

## Rangaziun

Camp A: 1. Höri ZH, 967 puncts, 2. Gonten AI, 964, 3. Ibach-Schönenbuch SZ, 960, 14. Haldenstein, 948.

Camp D: 1. Dallenwil NW, 711 puncts, 2. Tumeigl I, 707, 3. Eggersriet-Grub SG, 704, 4. Boningen, SO, 701, 5. Ennenda NW, 700, 6. Sattel SZ, 698, 7. Wiedlisbach, BE, 694, 8. Tumeigl II, 684, 34 Scharans, 670.

Camp E: 1. St. Stephan BE, 689 puncts, 2. Pfeffingen BL, 680, 3. Dombresson-Viliers NE, 679, 14. Haldenstein, 948.

Rangaziun cumpletta: [www.swissshooting.ch](http://www.swissshooting.ch)



Cunzont ainten la sagonda mesadad è la defeisa digl CB Surses stada ferm sot pressiuun.

FOTO G. N. STGIER

## Siva dalla pôssa betg gia stetg

Ballape: Surses – Triesen 1:4 (0:1)

DA GION NUTEGN STGIER / ANR

■ Clera tarada pigl CB Surses cunter en adversari tgi è an tots gros sto pi ferm. Aglmanc è anc reuschia a Gianluca Augustin da far igl gol d'onour per ambelleir igl resultat ord vista dalla equipa indigena. Siva digls dus paris cunter Scuol e cunter Domat è igl CB Surses retschet pigl terz gi a Tinizong l'equipa da Triesen. Eneda duple è Philipp Berri, igl trenader digl CB Surses, betg gia a disposiziun igl antier cader cun esser ena buna part digls giueders a tgatscha. Giuia è alla fegn en team cun ena media da bung 20 onns, rinforzo cun l'egn u l'oter giueder pi rutino.

## Graztga allas bunas paradadas digl goli

Tiers la blera plievgia è sto pussebel da giuier cun relaziuns regularas cun esser igl plaz perfetg. Persiva eran las temperaturas tot oter tgi ampernevas sonda seira a Tinizong. L'equipa giovna digl CB Surses è l'amprema mesadad tignia pitg agl adversari e casso angal en gol. Tgi chegl è sto uscheia è per gronda part igl maret digl goli Men Candrea tgi è adegna sto segl post e fatg fegn allas numerosas schanzas dalla squadra digl Principadi da Liechtenstein. Fatg è Triesen igl 1:0 ainten la 22avla minuta e chegl siva dad en sbagl dalla defeisa digl CB Surses. Pussebladads da far durant las empremas

45 minutas digl gi ples gols pigl CB Surses è cunzont gia Giatgen Mitgel Bellini.

## La defeisa è disdetg

Siva dalla pôssa è Triesen augmento igl tempo, fatg duple squitsch e nizigia mintga pitschen sbagl digls defensours digl CB Surses. An chella cumposiziun è la defeisa darar giuia e la consequenza è stada tgi Triesen è profito da chella realitad. Marco è l'equipa gist treis gols e crudos èn chels tranter la 48avla minuta e la 60avla minuta. Gist la miglra impressiun è la defeisa digl CB Surses betg fatg siva dalla pôssa er cun far l'egn u l'oter sbagl individual. Betg sa cattsos tar igl gi usito èn cunzont Dario Albertin e Robin Demarmels, els tgi èn schiglio dus fermas pitgas dalla defeisa digl CB Surses. Gist tar els dus ins è gia l'impressiun tgi igls condefensours Curdin Baltermia, Adriano Dosch e Dario Kolb mantgan fitg per stabilisar la defeisa. Siva digl 4:0 è igl team da Berri ple u manc capitulo e surtot vurdo da betg cassar anc ulteriours gols, chegl tgi è alloura er reuschia. Bel è tuttegn tgi ainten la 75avla minuta è Gianluca Augustin anc marco igl gol d'onour pigl CB Surses, en gol tgi è sto ple tgi mirito. Mirito da far en gol siva dalla pôssa vess er Giatgen Mitgel Bellini e chegl siva 60 minutas cun eir egn digls sies bliers schozs angal per centimeters sur igl gol da Triesen.

## Schi predominant è igl adversari betg sto

Ballape 5. ligia: Surses – Lai/Valbella 0:4 (0:2)

DA GION NUTEGN STGIER / ANR

■ Igl amprem derbi surmiran è ia cler a favour da Lai/Valbella. Igl vaschigns digl li turistic on giuia fitg effiziant e transformo mintga buna schanza an en gol. Igl CB Surses è dantant sto mengia brav davant igl gol digl adversari. Avant dus onns è Lai/Valbella gia da far igl zap dalla 4. ligia ainten la ligia pi bassa, ainten la 5. ligia, lò noua tgi igl sagond team digl CB Surses gioia er. Dumengia passada è nia a Tinizong tar igl derbi surmiran e scu tg'ins so on derbis adegna lour atgnas leschas, er schi ena squadra è la favorita. Las miglras tgertas vevan ainten chel derbi an mintga cass chels da Lai/Valbella e scu tgi igl resultat da 4:0 conferma on els er nizigia chel bonus. Tant seia pero detg tgi schi predominant è igl adversari betg giuia. Chegl tgi con-

stat dantant è tgi Lai/Valbella è nizigia las schanzas sainza risguard e fatg igls gols, cuntrari agl CB Surses.

## Mantgea è er la furtegn

Antschet è igl gi gist cun en veir colp pigl CB Surses cun far Lai/Valbella gio siva treis minutas igl 1:0. Marco igl amprem gol da chel derbi è Renzo Valsecchi, igl anteriour skiunz tgi è ossa trenader tar Swiss Ski. Siva digl gol d'avantatg pigl adversari è l'equipa indigena dalunga reagea e giuia pi concentro. Catto ins è pero nign recept da survantscher la defeisa stabila da Lai/Valbella e da far igl pari. Persiva on igls giasts marco ainten la 26avla minuta igl 2:0 e chegl antras Marco Zollinger. El è sagetto en bel schoz aint igl cantung sanester digl gol e mantgea è angal pac tgi a Fabio Stecher fiss reuschia da sviar la balla siva la pitga or.

Curt sessour on Matia Demarmels ed Ivano Simonet gia disfurtegn cun lour schozs. Donn è tgi la balla è betg eida aint igl gol, mabagn per centimeters sur chel or.

## En bellezza colp liber

Siva 50 minutas è Nico Demarmels tutgia cugl sies colp da testa angal la latta, uscheia tgi er siva dalla pôssa è igl CB Surses betg gia igl cletg basignivel. Chel è persiva gia Lai/Valbella cun far ainten la 53avla minuta igl 3:0, graztga ad en colp liber da bellezza da 20 meters e tratg d'Andrin Zenklusen. Pac siva chel è Nico Demarmels danovamaintg gia disfurtegn giond la balla angal per pac sur igl gol or. Igl 4:0 per Lai/Valbella antras Vladenko Tanasic è ple u manc angal ambellia igl resultat tgi è sto blier mengia cler a favour digl adversari.



En derbi surmiran interessant cun la miglra fegn per Lai/Valbella.

FOTO G. N. STGIER